

საქართველოს უზენაესი სასამართლოს მოსამართლის თანამდებობაზე ასარჩევად საქართველოს
პარლამენტისათვის წარსადგენი სამოსამართლო გამოცდილების მქონე
მოსამართლეობის კანდიდატის შეფასების ფორმა

მოსამართლეობის კანდიდატის - ეკატერინე კულულაშვილის შეფასების შედეგი:

მოსამართლეობის კანდიდატის შეფასება კეთილსინდისიერების კრიტერიუმის მიხედვით		
მოსამართლეობის კანდიდატი არ აკმაყოფილებს კეთილსინდისიერების კრიტერიუმს	☐	
მოსამართლეობის კანდიდატი აკმაყოფილებს კეთილსინდისიერების კრიტერიუმს	☐	
მოსამართლეობის კანდიდატი სრულად აკმაყოფილებს კეთილსინდისიერების კრიტერიუმს	☒	
მოსამართლეობის კანდიდატის შეფასება კომპეტენტურობის კრიტერიუმის მიხედვით		
კრიტერიუმი	მიღებული ქულა	მაქსიმალური ქულა
სამართლის ნორმების ცოდნა	17	20
სამართლებრივი დასაბუთების უნარი და კომპეტენცია	18	20
წერის უნარი	18	20
ზეპირი კომუნიკაციის უნარი	14	15
პროფესიული თვისებები, მათ შორის, ქცევა სასამართლო დარბაზში	14	15
აკადემიური მიღწევები და პროფესიული წვრთნა	4	5
პროფესიული აქტივობები	4	5
ქულათა ჯამი	89	100

სახელი, გვარი:



ნიკოლოზ მარსაგიშვილი
თარიღი : 31.07.2025



საქართველოს იუსტიციის უმაღლესი საბჭოს მდივანი ნიკოლოზ მარსაგიშვილი

საქართველოს უზენაესი სასამართლოს მოსამართლის შერჩევის პროცედურაში
მონაწილე კანდიდატის - **ეკატერინე კულულაშვილის** შეფასების დასაბუთება

საქართველოს იუსტიციის უმაღლესი საბჭოს 2024 წლის 31 დეკემბრის №1/164 განკარგულებით დაწყებული, უზენაესი სასამართლოს მოსამართლის თანამდებობაზე ასარჩევად საქართველოს პარლამენტისათვის წარსადგენი კანდიდატის შერჩევის პროცედურის ფარგლებში, კანდიდატ ეკატერინე კულულაშვილის შეფასების დასაბუთების შედგენის პროცესში ვიხელმძღვანელებ „საერთო სასამართლოების შესახებ“ საქართველოს ორგანული კანონის 34¹-ე მუხლის მე-11 პუნქტით დადგენილი წესით.

1. კანდიდატის შეფასება კეთილსინდისიერების კრიტერიუმის მახასიათებლების მიხედვით.

უზენაესი სასამართლოს მოსამართლის შერჩევის პროცედურაში მონაწილე კანდიდატი ეკატერინე კულულაშვილი კეთილსინდისიერების კრიტერიუმით შეფასდა „საერთო სასამართლოების შესახებ“ საქართველოს ორგანული კანონის 35¹ მუხლით დადგენილი მახასიათებლების მიხედვით.

იმის დასადგენად, თუ რამდენად აკმაყოფილებს კანდიდატი ეკატერინე კულულაშვილი კეთილსინდისიერების კრიტერიუმს, „საერთო სასამართლოების შესახებ“ საქართველოს ორგანული კანონის შესაბამისად ამ დასკვნაში წარმოდგენილი და გაანალიზებულია მისი შეფასება აღნიშნული კრიტერიუმის თითოეულ მახასიათებელთან მიმართებაში. კერძოდ, ეკატერინე კულულაშვილის, როგორც საქართველოს უზენაესი სასამართლოს მოსამართლეობის კანდიდატის შეფასება განხორციელდა კეთილსინდისიერების კრიტერიუმის შემდეგი მახასიათებლების მიხედვით: პიროვნული კეთილსინდისიერება და პროფესიული სინდისი; დამოუკიდებლობა, მიუკერძოებლობა და სამართლიანობა; პიროვნული და პროფესიული ქცევა; პიროვნული და პროფესიული რეპუტაცია და ფინანსური ვალდებულება.

კეთილსინდისიერების კრიტერიუმით ეკატერინე კულულაშვილის შეფასება დაეყრდნო კანდიდატის შესახებ მოძიებულ ინფორმაციას, რა დროსაც სხვადასხვა უწყებიდან მის შესახებ გამოთხოვილ იქნა შემდეგი სახის ინფორმაცია: საქართველოს შინაგან საქმეთა სამინისტროდან და ქ. თბილისის მუნიციპალიტეტის ტრანსპორტისა და ურბანული განვითარების სააგენტოდან - მონაცემები ადმინისტრაციული სამართალდარღვევების შესახებ; სს „კრედიტინფო საქართველოდან“ - სრული პერსონალური საკრედიტო ინფორმაცია; საქართველოს ფინანსთა სამინისტროს შემოსავლების სამსახურიდან - ცნობა შემოსავლების შესახებ; ანტიკორუფციული ბიუროდან - ქონებრივი მდგომარეობის შესახებ დეკლარა-

ცია; კანდიდატის სამუშაო ადგილიდან - ინფორმაცია დისციპლინური სამართალწარმოების შესახებ.

ამასთანავე, კანდიდატის დახასიათების მიზნით გამოთხოვილ იქნა მასთან სამსახურებრივ და პირად ურთიერთობაში მყოფ პირთა მიერ შევსებული სპეციალური ფორმის რეკომენდაციები/კითხვარები. შეფასებისას აგრეთვე გათვალისწინებული იქნა კანდიდატის მიერ წარდგენილ განაცხადში მითითებული ინფორმაცია და საჯარო მოსმენის პროცესში უშუალოდ მის მიერ გამოვლენილი თვისებები.

კანდიდატის პიროვნული კეთილსინდისიერებისა და პროფესიული სინდისის მახასიათებლის მიხედვით შეფასებისას მხედველობაში მივიღე, რომ რეკომენდატორები და სხვა გამოკითხული პირები ეკატერინე კულულაშვილს ახასიათებენ დადებითად, გამოარჩევენ მის ისეთ თვისებებს, როგორიც არის პასუხისმგებლობის მაღალი შეგნება, გულწრფელობა, გამჭვირვალობა და სხვა დადებით თვისებებს. გამოკითხულ პირებს მიაჩნიათ, რომ კანდიდატი სრულად აკმაყოფილებს კეთილსინდისიერების კრიტერიუმს. აქვე უნდა აღინიშნოს, რომ ბოლო სამი წლის განმავლობაში ეკატერინე კულულაშვილს არ უფიქსირდება ადმინისტრაციული სამართალდარღვევის ჩადენის ფაქტი. ამდენად, მიმაჩნია, რომ ეკატერინე კულულაშვილს გააჩნია პასუხისმგებლობისა და მოვალეობების მაღალი შეგნება და სამსახურებრივ თუ სხვა სახის მოვალეობებს ის ასრულებს ჯეროვნად.

დამოუკიდებლობის, მიუკერძოებლობისა და სამართლიანობის მახასიათებელთან დაკავშირებით გამოკითხული რეკომენდატორები და სხვა რესპოდენტები კანდიდატს აფასებენ, როგორც პრინციპულ, მიუკერძოებელ და სამართლიან პიროვნებას, რომელსაც შეუძლია გადაწყვეტილების დამოუკიდებლად მიღება. კანდიდატი არ ყოფილა პოლიტიკური პარტიის წევრი, მხარდამჭერი ან/და შემომწირველი და საჯარო მოსმენაზეც მისი მხრიდან არ გამოვლინდა პოლიტიკური ან სხვაგვარი მიკერძოებულობის ნიშნები.

პიროვნული და პროფესიული ქცევის მახასიათებელთან დაკავშირებით უნდა აღინიშნოს, რომ ეკატერინე კულულაშვილი თავდაქერილია და მართავს საკუთარ ემოციებს. კანდიდატის მოსმენის შედეგად დამრჩა შთაბეჭდილება, რომ იგი არის თავაზიანი და კორექტული. ეკატერინე კულულაშვილის მიმართ დისციპლინური დევნა ან/და სისხლისსამართლებრივი წარმოება არ დაწყებულა. საქართველოს გენერალური პროკურატურიდან გამოთხოვილი ინფორმაციით, ეკატერინე კულულაშვილი დაზარალებულად ცნობილია სისხლის სამართლის 2 საქმეზე, - 2022 წლის 27 აპრილის და 2023 წლის 31 აგვისტოს, საქართველოს სისხლის სამართლის კოდექსის 366-ე მუხლის პირველი და მე-2 ნაწილებით გათვალისწინებული დანაშაულების ჩადენის გამო (სასამართლოს უპატივცემულობა). საქართველოს საერთო სასამართლოებში წარმოებულ დავებში კანდიდატის მხარედ მონაწილეობის თაობაზე ინფორმაცია ელექტრონული საქმისწარმოების საძიებო სისტემაში არ მოიძებნა.

კანდიდატის პიროვნული და პროფესიული რეპუტაციის მახასიათებლის მიხედვით მის პიროვნულ და პროფესიულ თვისებებს რეკომენდატორები და გამოკითხული პირები აფასებენ დადებითად. ამასთან, იუსტიციის უმაღლესი საბჭოს საზოგადოებასთან და მედიასთან ურთიერთობის სამსახურის მიერ მოწოდებული ინფორმაციით, ეკატერინე კულულაშვილის შესახებ ინტერნეტ სივრცეში ხელმისაწვდომია ინფორმაცია მის სამოსამართლო საქმიანობასთან დაკავშირებით.

ფინანსური ვალდებულების მახასიათებელთან დაკავშირებით შესაძლებელია ითქვას,

რომ ეკატერინე კულულაშვილი ჯეროვნად ასრულებს ფინანსურ ვალდებულებებს. აქვს მიმდინარე სესხები. მას სახელმწიფო ბიუჯეტის მიმართ დავალიანება არ ერიცხება და მეწარმეთა და არასამეწარმეო იურიდიულ პირთა რეესტრში რეგისტრირებული არ არის. ამდენად, არ არსებობს მისი ქონებრივი ინტერესების მართლმსაჯულების ინტერესებთან დაპირისპირების საფუძველი, რამაც შესაძლოა შემდგომში საფრთხის ქვეშ დააყენოს მოსამართლის მიუკერძოებლობა.

ყოველივე ზემოაღნიშნულიდან გამომდინარე, კეთილსინდისიერების კრიტერიუმის მახასიათებლების გაანალიზების შედეგად არ გამოიკვეთა გარემოება, რაც ეჭვქვეშ დააყენებდა კანდიდატის კეთილსინდისიერების საკითხს, რის გამოც მოცემული კრიტერიუმის ხუთივე მახასიათებლით შემოწმებისას კანდიდატი შევავსა სრულად დადებითად და მიმაჩნია, რომ **ეკატერინე კულულაშვილი**, „საერთო სასამართლოების შესახებ“ საქართველოს ორგანული კანონის 35¹ მუხლის მე-15 პუნქტის „გ“ ქვეპუნქტის შესაბამისად, **სრულად აკმაყოფილებს კეთილსინდისიერების კრიტერიუმს**.

2. კანდიდატის შეფასება კომპეტენტურობის კრიტერიუმის მახასიათებლების მიხედვით:

უზენაესი სასამართლოს მოსამართლეობის კანდიდატი ეკატერინე კულულაშვილი კომპეტენტურობის კრიტერიუმის მიხედვით შევავსე „საერთო სასამართლოების შესახებ“ საქართველოს ორგანული კანონის 35¹ მუხლის მე-17 პუნქტით დადგენილი წესით.

ორგანული კანონის თანახმად, კომპეტენტურობის კრიტერიუმის საფუძველზე ეკატერინე კულულაშვილის შეფასებისას მხედველობაში მივიღე აღნიშნული კრიტერიუმის მახასიათებლები - სამართლებრივი ნორმების ცოდნა; სამართლებრივი დასაბუთების უნარი და კომპეტენცია; წერის უნარი; ზეპირი კომუნიკაციის უნარი; პროფესიული თვისებები, მათ შორის, ქცევა სასამართლო დარბაზში; აკადემიური მიღწევები და პროფესიული წვრთნა, პროფესიული აქტივობა. აღსანიშნავია, რომ კომპეტენტურობის კრიტერიუმის მიხედვით შეფასება დაეყრდნო კანდიდატის შესახებ მოძიებულ ინფორმაციას, მის მიერ გამოტანილი განაჩენების შესწავლით მიღებულ ინფორმაციასა და საჯარო მოსმენის შედეგად შექმნილ შთაბეჭდილებას.

სამართლებრივი ნორმების ცოდნის მახასიათებლის მიხედვით კანდიდატის შეფასებისას გავითვალისწინე საჯარო მოსმენის დროს მის მიერ გამოვლენილი მატერიალური და საპროცესო კანონმდებლობისა და ადამიანის უფლებების სამართლის ცოდნის დონე და, აგრეთვე, კანდიდატის მიერ განხილულ საქმეებზე გამოტანილ განაჩენებში შესაბამისი სამართლის ნორმების გამოყენების სისწორე.

კანდიდატის საჯარო მოსმენა გაიმართა 2025 წლის 30 აპრილს, რა დროსაც იუსტიციის უმაღლესი საბჭოს წევრებმა კანდიდატს დაუსვეს ზოგადი და კონკრეტული სამართლებრივი ხასიათის შეკითხვები. შეფასების პროცესში ასევე შესწავლილ იქნა ეკატერინე კულულაშვილის მიერ განხილულ საქმეებზე წარმოდგენილი განაჩენები: ბათუმის საქალაქო სასამართლოს სისხლის სამართლის საქმეთა კოლეგიის 2024 წლის 27 თებერვლის განაჩენი (საქმე N1/1054 – 23); თბილისის სააპელაციო სასამართლოს სისხლის სამართლის საქმეთა პალატის 2023 წლის 6 ივლისის განაჩენი, (საქმე N18/2029 – 22); ბათუმის საქალაქო სასამართლოს სისხლის სამართლის საქმეთა კოლეგიის 2024 წლის 1 ნოემბრის განაჩენი (საქმე N 1-422/24).

კანდიდატის მიერ წარმოდგენილი განაჩენების შესწავლისა და საჯარო მოსმენის შედეგად შემიძლია დავასკვნა, რომ ეკატერინე კულულაშვილი კარგად ფლობს სისხლის სამართლის მატერიალურ და საპროცესო სამართლის თეორიულ საფუძვლებს. მას აქვს პირველი და სააპელაციო ინსტანციის სასამართლოებში სისხლის სამართლის საქმეთა კოლეგიის (პალატის) მოსამართლედ მუშაობის ხანგრძლივი პრაქტიკული გამოცდილება. საჯარო მოსმენისას კანდიდატის პასუხები განმტკიცებული იყო როგორც პრაქტიკული გამოცდილებით, ისე ეროვნული სასამართლოების პრეცედენტებით.

საბოლოოდ შემიძლია დავასკვნა, რომ კანდიდატი ეკატერინე კულულაშვილი კარგად იცნობს სისხლის სამართლის მატერიალურ და საპროცესო კანონმდებლობას, ამასთან, კანდიდატის მიერ წარმოდგენილი განაჩენების და საჯარო მოსმენის შეფასების შედეგად, შეიძლება ითქვას, რომ ეკატერინე კულულაშვილი ეცნობა როგორც ადამიანის უფლებათა ევროპული სასამართლოს, ისე ეროვნული სასამართლოების პრაქტიკას.

კანდიდატის სამართლებრივი დასაბუთების უნართან და კომპეტენციასთან დაკავშირებით აღსანიშნავია, რომ ეკატერინე კულულაშვილს აქვს ხანგრძლივი პროფესიული, მათ შორის, მოსამართლის თანამდებობაზე მუშაობის თითქმის 10 წლიანი გამოცდილება. მიმაჩნია, რომ კანდიდატის მიერ ჩამოყალიბებული მოსაზრებები, ფაქტობრივი და სამართლებრივი თვალსაზრისით, დამაჯერებელი და დასაბუთებულია.

კანდიდატის **წერის უნართან** დაკავშირებით აღსანიშნავია, რომ ეკატერინე კულულაშვილი მის მიერ მიღებულ გადაწყვეტილებებში კარგად იყენებს და აანალიზებს სამართლებრივ ნორმებს. შესწავლილ დოკუმენტებში თვალსაჩინო გრამატიკული ხასიათის შეცდომა არ გამოვლენილა. კანდიდატი, განაჩენების დასაბუთებისას, იყენებს საქართველოს უზენაესი სასამართლოს პრაქტიკას და ადამიანის უფლებათა ევროპული სასამართლოს მიერ დადგენილ პრაქტიკას. განაჩენის დასაბუთების კონტექსტში მას ასევე გამოყენებული აქვს საკონსტიტუციო სასამართლოს გადაწყვეტილებაც. ამდენად, მიმაჩნია, რომ კანდიდატს გააჩნია სათანადო წერის უნარი.

ზეპირი კომუნიკაციის უნართან დაკავშირებით უნდა აღინიშნოს, რომ ეკატერინე კულულაშვილი გამოირჩევა გამართული მეტყველების უნარითა და სხვისი აზრის მოთმინებით მოსმენის თვისებით. კანდიდატმა საჯარო მოსმენაზე თანმიმდევრულად, ნათლად და ლოგიკურად გადმოსცა საკუთარი აზრი.

პროფესიული თვისებების, მათ შორის, სასამართლო დარბაზში ქცევასთან დაკავშირებით შეიძლება ითქვას, რომ ეკატერინე კულულაშვილი მიზანდასახული, პრინციპული, საქმისადმი ერთგული, ემოციურად გაწონასწორებული, კეთილსინდისიერი, თავშეკავებული პიროვნებაა.

აღსანიშნავია მის მიერ საქმეთა განხილვის თაობაზე სტატისტიკური ინფორმაცია, რომლის თანახმად, კანდიდატს საქმის განხილვის საპროცესო ვადები დაცული აქვს საქმეთა 100% შემთხვევაში, ასევე, საქმეთა 100% შემთხვევაში დაცული აქვს გადაწყვეტილების მომზადების საპროცესო ვადები. ეკატერინე კულულაშვილის მიერ გამოტანილი გადაწყვეტილებები, ზემდგომ სასამართლოში გასაჩივრების შემდეგ, უცვლელი დარჩა საქმეთა 97,5% შემთხვევაში. კანდიდატს საანგარიშო პერიოდში (975 დღეში) დასრულებული აქვს 2944 საქმე (დღეში საშუალოდ 3 საქმე), რაც ძალიან კარგი შედეგია.

ამასთან, არ არსებობს რაიმე ინფორმაცია კანდიდატის მიმართ დისციპლინური წარმოების დაწყების შესახებ.

შესაბამისად მიმაჩნია, რომ ეკატერინე კულულაშვილი სამოსამართლო უფლებამოსილებას ახორციელებს წარმატებით და კეთილსინდისიერად.

აკადემიური მიღწევებისა და პროფესიული წვრთნის მახასიათებლით კანდიდატის შეფასებისას გავითვალისწინე, რომ ეკატერინე კულულაშვილს აქვს თვითგანვითარების, ახალი ცოდნისა და უნარების შეძენის ინტერესი და მიღებულ ცოდნას წარმატებით იყენებს პრაქტიკაში. მას ჩაბარებული აქვს მოსამართლის საკვალიფიკაციო გამოცდა სისხლის სამართლის სპეციალიზაციით. კანდიდატი აქტიურად მონაწილეობს სამართლებრივი სისტემისა და მართლმსაჯულების საკითხებზე გამართულ სამუშაო შეხვედრებსა და სემინარებში. ამასთან, კანდიდატი იყო საქართველოს იუსტიციის უმაღლესი სკოლის მსმენელი.

კანდიდატის **პროფესიული აქტივობის** შესახებ შეიძლება ითქვას, რომ ეკატერინე კულულაშვილი აქტიურად მონაწილეობს მართლმსაჯულების საკითხებზე გამართულ სხვადასხვა ღონისძიებაში.

ეკატერინე კულულაშვილმა მონაწილეობა მიიღო შემდეგ ღონისძიებებში: 2023 წლის 12-14 ივლისი, კომპლექსი „ლოპოტა“, სისხლის სამართლის მნიშვნელოვან და აქტუალურ საკითხებთან დაკავშირებით გამართული სამუშაო შეხვედრა; 2023 წლის 6-8 დეკემბერი, წინანდალი, სამოქალაქო, ადმინისტრაციული და სისხლის სამართლის მნიშვნელოვან და აქტუალურ საკითხებთან დაკავშირებით გამართული სამუშაო შეხვედრა; 2024 წლის 10-11 სექტემბერი, ქ. ბათუმში, სასტუმრო „ჰილტონ ბათუმი“, გაეროს ქალთა ორგანიზაციის (UN Women), ევროპის საბჭოსა (CoE) და საქართველოს პროკურატურის მიერ ორგანიზებული ტრენინგი – „შეზღუდული შესაძლებლობის მქონე ქალების მართლმსაჯულებაზე ხელმისაწვდომობა“ და სხვა.

ამდენად, **კომპეტენტურობის კრიტერიუმის** თითოეულ მახასიათებელთან მიმართებით კანდიდატის შეფასებისას გავითვალისწინე მისი ცოდნა, კომპეტენცია, გამოცდილება, პროფესიული თვისებები, უნარ-ჩვევები და სხვა მნიშვნელოვანი მახასიათებლები. აღნიშნული ინფორმაციის შეჯერებისა და შეფასების საფუძველზე კი დადგინდა, რომ **ეკატერინე კულულაშვილის** მიერ დაგროვილ ქულათა ჯამი მაქსიმალური 100 ქულიდან შეადგენს **89** ქულას.

შემფასებელი:



ნიკოლოზ მარსაგიშვილი

თარიღი: 31.07.2025